


Ұлттық мәселелер мінберіне айналып келеді

Қоғамдық-саяси, әлеуметтік-экономикалық, рухани-мәдени тұрғыдан берері зор Ұлттық құрылтай биыл төртінші рет өтіп отыр. Ұлттық құрылтайлардың кезекпен өліміздің әр қаласында өтуінде де үлкен мән бар. Аталған орындардың қай-қайсысы да қазақ руханияты тұрғысынан алғанда өте маңызды қалалар.

Бурабай баурайында өткен басқосуда сөз болған мәселелердің біреуіне ғана тоқталар болсам, бізде көтерілген бастамалардың байыбына бармай жатып, науқаншылдыққа айналдырып жіберетін жаман әдет бар. Мемлекет басшысы бұл келеңсіздікті өте орынды сынады. Мысалы, елдің бола-



шағы үшін, талабы бар жастардың жағдайын ыңғайластыру мақсатында «Болашақ» бағдарламасы қолға алынған болатын. Бүгінде сол бағдарламамен ата сақалы аузына түскен қариялар да шетелде

білім іздеп жүрген көрінеді. Дәлірек айтсақ, Президент Ұлттық құрылтайда 78 жастағы қазақстандықтың «Болашақ» бағдарламасы бойынша шетелге оқуға кеткенін сынға алды. «78 жасында «Болашақ» бағдарламасы бойынша оқуға кетті. 78 жасында қандай «Болашақ» болуы мүмкін? Бұл бағдарлама түсініксіз бағытқа бұрылып барады. Бастапқыда бұл жақсы бастама еді — ғалымдарды оқыту, шетелде тағлымдамалар ұйымдастыру. Ал, қазір не болып кетті?» деді Қасым-Жомарт Кемелұлы.

Иә, біз неге барлық нәрсе-ні өзіміздің ыңғайымызға қарай бұрып алуға құмармыз? Осылайша тәп-тәуір дүниенің

ту-талақайын шығарып жатамыз. Бәлкім алқалы жиындарда осындай олқылықтар ашық сыналса, алдағы уақытта басқаларға сабақ болатын шығар. Қалай айтқанда да Ұлттық құрылтай ұлттық мәселелерді көтеретін мінберге айналып келе жатқаны анық.

**Кеңес СЕРІКБАЙ,
М.Әуезов атындағы
Оңтүстік Қазақстан
зерттеу университетінің
доценті, ауыл
шаруашылығы
ғылымдарының
кандидаты,
Жетісай ауданының
құрметті азаматы.**